

Ini Sa Igsulat Denu Sa MEDOO DATÙ Migsabà Sa Tanà Islaél

Ini Denu Sa Libelu 1 Medoo Datù

Na, ini sa kinepelagbas sa gugud denu sa kedatuan sa medoo etaw egsabà sa tanà Islaél egoh anay. Tinulon dahini sa egoh i Datù Dabid nematay owoy si Salomon anak di sa nekesambì kenagdi migkedatù. Miglalag Datù Salomon i enù ka binaelan di sa Dalesan i Nemula kenà da egsimbà owoy tigtu metudà ma sa keantang di. Agulé danà i Salomon mig-iniyug diyà si Nemula, nesebaed sa kedatuan di anì mebaluy duwa dé sa datù dahiya, sebaen diyà sa tanà Huda denu kimataan owoy sebaen diyà sa tanà Islaél denu belabagan. Agulé duen sa datù migbael mepion, owoy duen ma sa migbael medaet. Dodoo adi-adi pa sa binaelan sa medoo datù egsabà sa tanà Huda diyà sa binaelan sa medoo datù diyà sa tanà Islaél. Agulé inilingan da ma sa medaet binaelan sa datù diyà sa tanà Islaél. Hê, eg-iniyugan da Nemula i enù ka egpenemulawen da polo sa medoo inetaw, huenan di egpigtamayan i Nemula doo kagda.

Na, iya ma sa tinulon dahini sa binaelan sa medoo tegesugkow kagi i Nemula. Duwa sa tegesugkow di miglalag, si Iliyas owoy si Ilisiya.

Ini Sa Egoh I Datù Dabid Nematay

(1 Medoo Datù 2:1-4,10-12)

2 ¹Na, egoh i Dabid egtugedam sa egoh di buyu dé mematay, inikagiyan di sa anak di si Salomon, ²guwaen di, “Buyu dé meelut sa pused ku. Huenan di, pebagel ko sa pedu ko owoy ilingi ko adat sa lukes maama. ³Pangunuti ko takà sa langun igsugù i Datù Nemula, owoy baeli ko ma sa uyot di. Pangunuti ko sa medoo uledin di owoy sa medoo kitab di owoy sa medoo igsugù di igpesulat di diyà si Mosis. Amuk baelan

ko iya wé, kumepion doo sa ketamanan sa langun baelan ko sumalà dé sa angayan ko. ⁴Owoy ipetuu i Datù Nemula ma sa igpasad di diyà kenak egoh di migtulon diyà kenak dumuen doo sa tugod ku kumedatù diyà siini uwang tanà Islaél taman sa egoh da daa tigtu egpangunut diyà si Nemula danà di sebaen daa sa pedu da diyà si Nemula.”

¹⁰Na, neuma dé sa egoh i Datù Dabid nematay, owoy iglebeng da diyà Hélusalém sa pinengadanan da Menuwa i Dabid. ¹¹Na, epat pulù gepalay sa lugay i Dabid migpedatù, enù ka pitu gepalay sa lugay di datù diyà sa menuwa Hibelon, agulé telu pulù owoy telu gepalay sa lugay di datù egoh di mig-ugpà diyà Hélusalém. ¹²Agulé egoh i Dabid nematay, sa anak di si Salomon dé sa nekesambi kenagdi migkedatù, owoy tigtu migkebagel sa kedatuan di.

Ini Sa Egoh I Salomon Migpegeni Diyà Si Nemula Anì Tigtu Kumilantek

(1 Medoo Datù 3:1-15)

3 ¹Na, nesesasad da Salomon i si Palo sa datù tegeIgiptu egoh i Salomon migsawa sa anak i Palo. Agulé inuwit i Salomon sa bayi anak i Palo diyà sa Menuwa i Dabid, owoy pineugpà di dahiya taman sa egoh di meubus egbael sa dalesan di metolol owoy sa Dalesan i Nemula kenà da egsimbà owoy sa kutà nekeulingut diyà sa menuwa Hélusalém. ²Na sa medoo tegeIslaél, iya pelawà sa kenà da eg-ulow sa ibegay da diyà si Nemula sa medoo atung kenà da eg-ulow binaelan da diyà sa medoo getan-getan, enù ka egoh iya, endà pa egbaelan da duu sa Dalesan i Nemula kenà da egsimbà diyà kenagdi. ³Na, tigtu eghiduwan i Salomon Datù Nemula i, owoy egpangunut ma diyà sa igsasà sa emà di si Dabid. Dodoo apiya di pa hediya sa egbaelan di, dutu doo siedò getan-getan sa kenà di eg-ulow sa mepion ngadeg owoy sa medoo hinagtay ma ibegay di diyà si Nemula.

⁴Na, sebaen agdaw mig-angay Datù Salomon i diyà sa menuwa Gibayon anì ulowen di sa ibegay di diyà si Nemula, enù ka dahiya sa mapulù atung kenà da eg-ulow sa hinagtay ibegay da amuk egsimbà da. ^aNa, egoh i Salomon egsimbà dahiya, igbegay di sa sengibu hinagtay eg-ulowen di diyà siedò atung kenà da eg-ulow.

⁵Na, egoh sa sigep egoh i Salomon pelawà dutu Gibayon dò, pinetegeinep i Datù Nemula. Mig-ikagi Nemula i diyà kenagdi, guwaen di, “Ngadan sa ungayaen ko ibegay ku diyà keniko?”

⁶Migsagbi Salomon i, guwaen di, “Igpehaa ko sa dakel kehidu ko diyà si Dabid emà ku sa sinaligan ko egoh anay, enù ka meeles sa kepangunut

^a 3:4 Diyà Gibayon sa Dakel Kemalig igpebael i Mosis egoh anay kenà da egsimbà diyà si Nemula. Huenan di, dahiya sa mapulù atung kenà da eg-ulow sa hinagtay ibegay da amuk egsimbà da. Basa ko ma 2 Kelonikas 1:3-6.

di diyà keniko owoy metiengaw owoy metudà ma sa pedu di diyà sa kehaa ko. Inumanan ko ma sa kehidu ko kenagdi danà ko mighemili kenak mekesambi kenagdi kumedatù ini egoh di, aken i sebaen anak di. ⁷Na, o Datù Nemula sa egpigtuuwen ku, igtuhì ko aken si Emà kumedatù, dodoo endà nelayam a egpedatù owoy tigtu endà duen sa egkegaga ku umipat. ⁸Dodoo igpeipat ko doo diyà kenak siini temù medoo etaw hinemilì ko, sa endà mebilang da danà da medoo temù. ⁹Huenan di, begayi ko aken sa milantek penemdem anì meipat ku siini medoo etaw hinemilì ko owoy anì meketiig a ma sa mepion owoy sa medaet. Enù ka ngadan di etaw sa mekeipat siini temù medoo etaw hinemilì ko amuk endà tabangan ko duu?”

¹⁰Na, netuuwan Nemula i diyà sa pinegeni i Salomon. ¹¹Huenan di, sinagbian di, guwaen di, “Na, danà di endà egpegeniyen ko duu sa egoh ko melalù diyà tanà ataw ka sa egoh ko mebegayan medoo pilak ataw ka sa egoh ko lumugpì sa medoo kuntelà ko, dodoo egpegeniyen ko polo sa milantek penemdem ko anì kumetudà sa keantang ko, ¹²huenan di, ipetuu ku doo sa egpegeniyen ko. Begayan ku kuna sa tigtu milantek penemdem endà metepeng di sa liyu etaw, iling ka sa medoo etaw egoh anay ataw ka sa etaw mekesetugdug diyà keniko. ¹³Owoy ibegay ku ma diyà keniko sa medoo endà egpegeniyen ko duu, sa medoo pilak owoy sa keolò da keniko anì endà metepeng ka sa medoo liyu datù nehagtay ini egoh di. ¹⁴Amuk unutan ko sa uyot ku owoy amuk tigtu ka mangunut diyà sa medoo uledin ku owoy sa medoo igsugù ku, lagà sa kepangunut i Dabid sa emà ko, begayan ku ma kuna sa lalù ko diyà tanà.”

¹⁵Agulé migtikela Salomon i. Hê, netiigan di tegeinap sa egoh di inikagiyan i Nemula. Agulé egoh di miglikù dutu Hêlusalém dò, mig-angay egtigdeg diyà sa taengan siedò Baul Tandà sa Igpasad i Datù Nemula owoy duen medoo hinagtay inulow di egoh di egsimbà, owoy duen ma sa medoo liyu hinagtay inimatayan di danà di egpesalamat diyà si Nemula, owoy igpebael di ma sa dakel pista anì mista sa langun etaw di.

Ini Sa Ketudà Keantang I Salomon

(1 Medoo Datù 3:16-28)

¹⁶Na, sebaen agdaw duen sa duwa bayi tegepediyangdang mig-angay diyà si Datù Salomon. ¹⁷Mig-ikagi sa sebaen bayi diyà kenagdi, guwaen di, “O Datù, aken owoy siini bayi, nesesuled ké diyà sa sebaen daa dalesan. Mig-anak a maama ligò di dahiya ma kagdi i diyà sa dalesan. ¹⁸Agulé egoh di neuma sa ketelu di agdaw, mig-anak ma maama kagdi ya, huenan di anan ké dé épê anak. Duwa ké daa anan bayi eglebù diatas, endà duen sa liyu etaw dahiya. ¹⁹Agulé sebaen sigep nematay sa anak

siini sebaen bayi minetumê di danà di migbelikid. ²⁰Hê, mig-enaw egoh di teliwadà sigep, owoy kinuwa di siini anak ku egoh ku egtudug pelawà owoy igsambi di sa hagdi anak nematay igtenà di diyà sa kilidan ku.

²¹Agulé egoh di sumimag egoh ku mig-enaw anì pesusuwen ku sa anak ku, hinaa ku nematay polo. Agulé egoh ku temù eghahaa sa batà, beken mabes iya sa anak ku.”

²²Dodoo mig-ikagi sa keduwa bayi, guwaen di, “Péh, egbutbut ka. Naken doo siini batà nehagtay, owoy niko polo iya wé nematay.”

Mig-ikagi dema sa bayi muna migtulon, guwaen di, “Endà tuu iya wé. Niko polo sa nematay, owoy naken iya wé nehagtay.” Hê, egkesesigbolow da diyà sa taengan i Datù Salomon.

²³Agulé mig-ikagi Datù Salomon i, guwaen di, “Duwa yu eg-ingani siini batà nehagtay, dodoo endà duen sa eg-ingani sa batà nematay. Na, ngadan tayu di sa épê ketuu diyà keniya?” ²⁴Agulé sinugù i Datù Salomon sa sebaen etaw di, guwaen di, “Uwiti ko aken sundang.” Hê, inangay sa sinugù di owoy inuwit di sa sundang diyà kenagdi. ²⁵Agulé mig-ikagi Datù Salomon i, guwaen di, “Tepi ko siini batà nehagtay anì sedibaluyan da.”

²⁶Hê, egoh sa tigtu inay sa batà migdineg iya wé, nekiyang sa atay di danà sa kehidu di sa anak di. Huenan di, mig-ikagi diyà si Datù Salomon, guwaen di, “O Datù, amuk hediya, begayi ko dé diyà kenagdi sa batà. Yaka daa egtepi duu.”

Dodoo mig-ikagi dema sa sebaen bayi, guwaen di, “Pelagbasi ko dé tepi anì endà duen sa tayu mekeépê.”

²⁷Agulé mig-ikagi dema Datù Salomon i, guwaen di, “Amuk hediya, endà tepiyen ta duu sa batà, enù ka mekebegay doo diyà sa bayi muna mig-ikagi, enù ka kagdi sa tigtu inay di.”

²⁸Na, egoh sa langun tegeIslaél migdineg sa lalag iya wé keantang i Datù Salomon, tigtu eg-adatan da kagdi enù ka netiigan da binegayan i Nemula dé kagdi sa milantek penemdem anì metudà sa keantang di.

Igpebael I Salomon Sa Dalesan I Nemula Simbaan Da

5:1–8:66 Na, igpebael i Datù Salomon sa Dalesan i Nemula kenà da egsimbà dutu Héluasalém dò. Tigtu metolol sa Dalesan i Nemula, enù ka linapinan da bulawan sa langun taman di, lapeg sa saeg di owoy sa kelatkat di ma. Pitu gepalay sa lugay da egbael, iya pelawà meubus.

Na, egoh di neubus dé sa Dalesan i Nemula, inuwit i Salomon sa medoo tegeIslaél egsetugdug diyà sa medoo tegesimbà enù ka angayen da sa Baul Tandà sa Igpasad i Nemula diyà sa Menuwa i Dabid pinengadanan da Siyon. Sineoyongon sa medoo tegesimbà sa Baul egoh da eg-uwit duu diyà sa Dalesan i Nemula igpebael i Salomon. Hê, tigtu da neanggan egoh da egpistawan duu sa egoh di neubus sa Dalesan i Nemula.

Na, egoh da dé miglaun sa medoo tegesimbà mig-uwit sa Baul, nelimunan gaeb sa Dalesan i Nemula sa simbaan da owoy nebensek ma senang i Datù Nemula.

Ini Sa Egoh I Nemula Migpetegeinep Dema Si Salomon

(1 Medoo Datù 9:1-9)

9 ¹Na, egoh i Datù Salomon neubus dé migbael sa Dalesan i Nemula simbaan da owoy sa hagdi ma metolol dalesan owoy sa medoo liyu dalesan ungayà di ipebael, ²migpehaa dema Datù Nemula i diyà si Salomon pineukit diyà sa tegeinep, lagà mendaa sa tegeinep di egoh di diyà Gibayon.

³Mig-ikagi Datù Nemula i diyà si Salomon, guwaen di, “Na, dinineg ku sa kepegeni ko egoh ko migsimbà diyà kenak. Owoy pilagaen ku siini metolol dalesan binaelan ko kenà yu sumimbà diyà kenak taman melugay. Tigtu ipaten ku siini simbaan owoy pedakelan pedu ku ini i taman melugay. ⁴Owoy kuna ma, amuk tigtu meeles sa keunut-unut ko diyà kenak, lagà mendaa sa keunut-unut sa emà ko si Dabid diyà kenak egoh anay, owoy amuk baelan ko sa langun ipebael ku diyà keniko owoy amuk pangunutan ko ma sa langun uledin ku owoy sa langun uyot ku, ⁵ipetuu ku doo sa igpasad ku diyà sa emà ko si Dabid egoh anay egoh ku migtulon diyà kenagdi dumuen sa tugod di kumedatù mesetugodtugod diyà siini tanà Islaél taman melugay. ⁶Dodoo amuk iniyugan ko aken ataw ka sa medoo tugod ko, owoy amuk endà pangunutan yu duu sa langun uledin ku owoy sa medoo igsugù ku diyà keniyu danà yu eg-unut diyà sa medoo liyu egpenemulawen yu, ⁷agulé pelegkaen ku doo sa medoo tegeIslaél kedu diyà siini tanà igbegay ku diyà kenagda owoy igtohonon ku ma siini metolol dalesan pinilagà ku kenà yu egsimbà diyà kenak. Owoy pelononon ma sa medoo liyu balangan etaw kiyu i medoo tegeIslaél. ⁸Owoy megubal siini metolol dalesan ku. Huenan di, megaip sa langun etaw tumalà, owoy mengulektek da. Owoy mikagi da, guwaen da, ‘Maen di ya hediya sa binaelan i Datù Nemula diyà siini tanà Islaél owoy diyà siini dalesan di?’ ⁹Agulé dumuen sa sumagbì, guwaen da, ‘Iya sa nebaelan enù ka ininiyugan da Datù Nemula i sa Nemula da sa miglaun sa medoo tupù da kedu Igiptu dò egoh anay. Migsimbà da polo diyà sa medoo liyu egpenemulawen da owoy mig-unut da ma diyà kenagda. Huenan di, pinelihay i Datù Nemula kagda.’ ”

Ini Sa Egoh I Salomon Mig-iniyug Diyà Si Nemula

(1 Medoo Datù 11:1-13)

11 ¹Na, medoo sa bayi kedu diyà sa medoo balangan tanà egkeiyapan i Datù Salomon. Duen sa bayi anak i Palo tegeIgiptu

sinawa di, owoy duen ma sa bayi tegeMoab owoy sa bayi tegeAmoniya owoy sa bayi tegeIdom owoy sa bayi tegeSidon owoy sa bayi tegeHétiyo sinawa di. ²Sinawa di kagda apiya di pa hinawidan i Datù Nemula sa medoo tegeIslaél anì endà sawaen da duu sa medoo liyu balangan etaw.^b Guwaen di, “Yoko eg sawa duu sa etaw beken duma yu tugod i Islaél, enù ka enggaten da doo kiyu egpenemula sa medoo liyu egpenemulawen da.” Dodoo egkeiyapan i Salomon polo eg sawa siedò medoo bayi. ³Pitu latuh sa kedoo sawa di anan anak datù, owoy telu latuh ma sa bayi udipen egsehulidhuliden di. Netuing sa pedu i Salomon kedu diyà si Nemula danà sa medoo sawa di.

⁴Na, egoh i Salomon migkelukes dé, inenggat sa medoo sawa di kagdi egpenemula sa medoo liyu nemula. Huenan di, endà dé meeles sa keunut di diyà si Datù Nemula lagà sa keeles keunut sa emà di si Dabid diyà si Nemula. ⁵Enù ka migpenemula polo diyà sa inetaw Astalot sa egpenemulawen sa medoo tegeSidon, owoy pinenemula di ma si Milkom sa nemula medaet atul egpenemulawen sa medoo tegeAmoniya. ⁶Huenan di, nebaelan i Salomon sa medaet diyà sa kehaa i Datù Nemula. Endà dé egkeeles sa keunut di diyà si Nemula lagà sa keunut i Dabid sa emà di diyà si Nemula.

⁷Agulé diyà sa getan denu tebowon agdaw amuk diyà ki Hélusalém, binaelan i Salomon sa kenà da egpenemula si Kimos sa nemula medaet atul egpenemulawen sa medoo tegeMoab, owoy binaelan di ma sa kenà da egpenemula si Molok sa nemula medaet atul egpenemulawen sa medoo tegeAmoniya. ⁸Hediya ma, binaelan di ma sa medoo simbaan kenà sa langun sawa di beken etaw tegeIslaél eg-ulow sa mepion ngadeg owoy eg-imatay da ma hinagtay enù ka iya sa ukit da egpenemula sa medoo nemula da.

⁹Huenan di, binulitan i Datù Nemula Salomon i enù ka ininiyugan di Datù Nemula i sa Nemula egpigtuuwen sa medoo tegeIslaél, owoy endà sinagipà di duu sa duwa gulê kepehaa i Nemula diyà kenagdi.^c ¹⁰Apiya di pa hinawidan i Nemula Salomon i egpenemula sa medoo liyu egpenemulawen, endà doo pinangunutan di duu sa igsugù i Datù Nemula. ¹¹Huenan di, mig-ikagi Datù Nemula i diyà si Salomon, guwaen di, “Danà ko migtipay sa nesepasadan ta owoy danà ko ma endà migpangunut diyà sa medoo igsugù ku keniko, huenan di kedanan ku diyà keniko sa kedatuan ko owoy ibegay ku polo diyà sa sebaen salu ko. ¹²Dodoo danà sa emà ko si Dabid, endà pelawà ipetuu ku duu iya wé egoh ko nehagtay pelawà. Dodoo ipetuu ku pa amuk sa anak ko dé sa kumedatù. ¹³Na, danà sa dakel kehidu ku si Dabid sa sinaligan ku egoh

^b 11:2 Basa ko Éksodo 34:16; owoy Dutilonomiyu 7:3-4 ^c 11:9 Basa ko 1 Medoo Datù 3:5-15; owoy 9:1-9

anay, owoy danà di ma Hélusalém sa menuwa hinemilì ku, huenan di endà kedanan ku duu diyà sa anak ko sa langun kedatuan. Dodoo samaen ku polo sa segeumpung tugod i Islaél kenà sa anak ko kumedatù.”

Ini Sa Egoh i Nemula Migpasad Sa Egoh i Héloboam Kumedatù

(1 Medoo Datù 11:28-33,36-40)

²⁸Na, duen sa maama épê egkegaga, si Héloboam. Egoh i Salomon mighaa sa kegelol di eggalebek, igsalig di diyà kenagdi sa langun tegegalebek diyà sa uwang tanà sa medoo tugod i Manasa owoy sa medoo tugod i Ipelaim.

²⁹Na, sebaen agdaw egoh i Héloboam mig-ipanaw kedu diyà Hélusalém, nesiegungan di Ahiyas i tegeSilo, sa tegesugkow kagi i Nemula. Endà duen sa liyu duma da egoh da nesehaa diyà dalan, owoy duen sa magtu kegal i Ahiyas. ³⁰Hê, egoh da nesehaa, linengà i Ahiyas sa magtu kegal di owoy sinekisikisi di sepulù owoy duwa lapin. ³¹Agulé mig-ikagi diyà si Héloboam, guwaen di, “Na, kuwa ko siini sepulù lapin, enù ka ini sa kagi i Datù Nemula diyà keniko, sa Nemula egpigtuuwen sa medoo tegeIslaél. Medapag dé kedanan i Nemula gaa sa kedatuan i Salomon, owoy ibegay di diyà keniko sa sepulù geumpung tugod i Islaél. ³²Segeumpung^d daen sa mesamà diyà si Salomon, danà sa dakel kehidu i Nemula si Dabid sa sinaligan di egoh anay owoy danà di ma Hélusalém sa menuwa hinemilì i Nemula diyà sa uwang tanà Islaél. ³³Iya sa baelan i Nemula enù ka ininiyugan i Salomon Nemula i, owoy neiyapan di polo egpenemula Astalot i sa inetaw éhê palas bayi egpenemulawen sa medoo tegeSidon owoy si Kimos sa egpenemulawen sa medoo tegeMoab owoy si Molok sa egpenemulawen sa medoo tegeAmoniya. Sinekê i Salomon sa uyot i Nemula owoy endà egbaelan di duu sa metiengaw adat diyà sa kehaa i Nemula, owoy endà ma egpangunutan di duu sa medoo uledin i Nemula owoy sa medoo liyu igsugù di, enù ka endà eg-ilingan di duu sa kepangunut sa emà di si Dabid diyà si Nemula egoh anay.”

³⁶Owoy guwaen i Ahiyas ma, “Na, segeumpung tugod i Islaél daen sa ibegay i Nemula diyà sa anak i Salomon, anì endà mekedan di sa kedatuan diyà sa medoo tugod i Dabid diyà Hélusalém, sa menuwa hinemilì i Nemula kenà ta sumimbà diyà kenagdi. ³⁷Na, o Héloboam, kuna sa pedatuen i Nemula diyà sa medoo liyu tegeIslaél, owoy kuna ma sa sumabà sa uwang tanà kenà ko egkelukuy kumedatù. ³⁸Amuk tigtu ka umunut diyà si Nemula owoy amuk mangunut ka diyà sa langun uledin di owoy amuk ilingan ko ma sa mepion adat kenà i Nemula metuuwan,

^d 11:32 Endà iglapeg di duu egbilang sa geumpung tugod i Bénhamin, enù ka lagà nesesebaen da sa geumpung tugod i Huda.

umunut-unut doo Nemula i diyà keniko. Tuu doo, amuk tigtu ka mangunut diyà sa langun uledin i Nemula lagà sa kepangunut i Dabid sa sinaligan di egoh anay, pelugayen i Nemula doo diyà keniko sa kedatuan ko mesetugdugtugdug, lagà sa binaelan i Nemula diyà si Dabid, enù ka kuna sa pedatuen i Nemula diyà sa sepulù geumpung tugod i Islaél.
³⁹Dodoo danà sa binaelan i Salomon, huenan di pigtamayan i Nemula doo sa medoo tugod i Dabid dodoo endà taman melugay di.”

⁴⁰Na, egoh i Datù Salomon neketiig iya wé, egkelukuyan di eg-imatay Héloboam i. Dodoo migpelaguy Héloboam i eg-apat diyà si Datù Sisak dutu Igiptu dò owoy mig-ugpà dutu taman sa egoh i Salomon nematay.

Ini Sa Egoh I Salomon Nematay

(1 Medoo Datù 11:42-43)

⁴²Na, epat pulù gepalay sa lugay i Salomon migpedatù diyà sa tanà Islaél egoh di endà pa nebaed sa uwang tanà sinabaan di. Mig-ugpà diyà Hélusalém sa lugay di datù. ⁴³Agulé egoh di nematay, iglebeng da diyà sa Menuwa i Dabid. Agulé sa anak i Salomon si Loboam sa nekesambì kenagdi migkedatù.

Ini Sa Egoh Di Nebaed Sa Kedatuan Tanà Islaél

(1 Medoo Datù 12:1-5,12-17,20)

12 ¹Na, mig-angay Loboam i diyà sa menuwa Sikem, enù ka nesetipon dahiya sa langun tegeIslaél kedu diyà sa belabagan diyà tanà Islaél anì tandaan da sa kedatù da kenagdi. ²Na, egoh i Héloboam anak i Nabat neketiig si Loboam dé sa datù nekesambì diyà si Salomon, iya pelawà miglikù eg-angay diyà Islaél kedu diyà Igiptu sa inangayan di egpelaguy egoh i Salomon buyu eg-imatay kenagdi. ³Na, egoh i Héloboam migtebow, linapit sa medoo etaw kedu belabagan kagdi, agulé neseunut da eg-angay diyà si Datù Loboam. Egoh da migtebow, mig-ikagi da diyà si Loboam, ⁴guwaen da, “Tigtu pinedeumà sa emà ko si Salomon kami i owoy lagà pinebegatan di kami danà sa medoo binaelan di. Na, egpegeniyen ké diyà keniko anì pegaenen ko sa mebegat binaelan sa emà ko diyà kenami. Amuk pegaenen ko, kumepion doo sa keunut-unut ké keniko.”

⁵Agulé migsagbì Loboam i, guwaen di, “Pelikù yu pa dini amuk meuma telu agdaw kedu ini egoh di, enù ka iya pelawà tulonen ku diyà keniyu sa sagbì ku.” Agulé miglikù sa medoo etaw.

¹²Na, egoh di neuma sa ketelu di agdaw, migpelikù Héloboam i owoy sa langun duma di eg-angay diyà si Datù Loboam, enù ka iya sa atas da pelikù inikagi i Loboam. ¹³Na, apiya di pa mepion hedem sa ipeikagi sa

medoo lukes etaw diyà si Loboam amuk sumagbì diyà siedò medoo etaw, endà doo inikagi di duu. Egkelanggetan di polo kagda. ¹⁴Iya polo sa tinultul di sa kagi sa medoo duma di nesetepengtepeng kelukes. Guwaen di, “Iya sa penemdem yu pinebegatan sa emà ku kiyu. Dodoo uman pa mebegat sa kepedeumà ku keniyu. Enù ka amuk lagà itapes di keniyu sa tapes binaelan diyà sa kunul hinagtay, iya polo sa itapes ku keniyu sa tapes épê dugi.” ¹⁵Na, endà egsagipaen i Loboam duu sa pinegeni siedò medoo etaw. Dodoo danà sa uyot i Datù Nemula polo sa inikagi di anì meketuu sa kagi i Ahiyas tegeSilo egoh di migsugkow sa kagi i Nemula diyà si Héloboam anak i Nabat.^e

¹⁶Na, egoh sa medoo tegeIslaél kedu belabagan neketiig sa sagbì sa datù diyà kenagda, mig-ikagi da, guwaen da, “Amuk hediya, endà duen sa nami pedu diyà si Dabid anak i Hési owoy diyà siini medoo tugod di. Pelikù ké dé, kami i medoo tegeIslaél,^f owoy salidan ké Datù Loboam i anì kumedatù daa diyà sa hagdi malayan.” Hê, miglikù dé sa medoo tegeIslaél. ¹⁷Dodoo iya daen sa kenà i Loboam migkedatù sa medoo etaw eg-ugpà diyà sa uwang tanà sa medoo tugod i Huda.

²⁰Na, egoh sa medoo tegeIslaél neketiig miglikù Héloboam i kedu Igiptu dò, igsasà da anì lumenged diyà sa kenà da egkesetipon. Agulé ginelal da kagdi sa datù diyà sa sepulù geumpung tugod i Islaél. Dodoo iya daa sa eg-unut-unut diyà sa tugod i Dabid sa medoo etaw tugod i Huda.

Ini Sa Egoh I Héloboam Mig-enggat Sa Medoo TegeIslaél Egbael Salà

(1 Medoo Datù 12:26-32)

²⁶⁻²⁷Na, iya sa penemdem i Héloboam endà dé mepion di amuk muman sa medoo etaw di mangay Hêlusalém dò anì ibegay da sa medoo hinagtay ulowen da amuk sumimbà da diyà si Datù Nemula diyà sa Dalesan i Nemula dutu. Guwaen di diyà sa pedu di, “Amuk pulung hediya sa baelan da, mekepelikù da doo dumatù diyà si Datù Loboam dutu Huda dò, agulé imatayan da aken enù ka dumatù da polo diyà si Loboam.” ²⁸Huenan di, egoh da i Héloboam egseolomoy sa medoo salu di, igpetunag di sa bulawan anì mael da sa duwa inetaw éhê palas manepeng nati sapi maama.^g Agulé

^e 12:15 Basa ko 1 Medoo Datù 11:29-39 ^f 12:16 Islaél sa sebaen ngadan i Hakob bébê i Abraham. (Génesis 32:28). Huenan di, tegeIslaél ma doo Dabid i owoy sa malayan di, enù ka tugod i Islaél da ma. Dodoo egoh siedò geumpung tugod i Islaél mig-eked siini geumpung tugod i Huda, endà dé pinengadanan da Islaél siini geumpung tugod i Huda, dodoo Huda daa. ^g 12:28 Binaelan di sa duwa inetaw éhê palas sapi lagà sa binaelan i Alon egoh anay. Basa ko Éksodo 32:4.

mig-ikagi Héloboam i diyà sa medoo etaw di, guwaen di, “O medoo tegeIslaél, yoko dé limah ha eg-angay Hélušalém dò, enù ka kaini dé sa Nemula yu sa Nemula miglaun keniyu kedu Igiptu dò.” ²⁹Hê, pinetigdeg di sa sebaen inetaw bulawan éhê palas sapì diyà sa menuwa Bétél, owoy pinetigdeg di ma sa sebaen diyà sa menuwa Dan.^h ³⁰Huenan di, tigtu neenggat sa medoo tegeIslaél egbael salà danà iya wé binaelan i Héloboam, enù ka mig-angay da polo egsimbà diyà sa taengan sa inetaw igpebael i Héloboam diyà sa menuwa Bétél ataw ka mig-angay da egsimbà dutu siedò menuwa Dan.

³¹Igpebael i Héloboam ma sa medoo simbaan diyà sa getan-getan, owoy ginela di ma tegesimbà sa medoo uloy etaw beken tugod i Lebi. ³²Owoy igsugù di ma sa kepista da amuk meuma sepulù owoy lima agdaw diyà sa kewalu di gebulan diyà kenagda, lagà sa kepista sa medoo tegeHuda.ⁱ Owoy eg-ilingan di ma sa galebek sa medoo tegesimbà, enù ka inimatayan di sa medoo hinagtay ulowen di egoh di egpenemula sa inetaw igpebael di éhê palas sapì dutu Bétél dò. Owoy diyà Bétél ma ginela di sa medoo tegesimbà egpeipaten di diyà sa medoo simbaan binaelan di diyà sa getan-getan.

Ini Sa Egoh I Nemula Migpigtamay Si Héloboam Danà Sa Salà Di

(1 Medoo Datù 13:1-2; 14:1-11,17-18)

13 ¹Na, sebaen agdaw duen sa sebaen tegesugkow kagi i Nemula kedu diyà Huda sinugù i Datù Nemula eg-angay Bétél dò. Hê, egoh di migtebow dutu, egsimbà Héloboam i egtigdeg dapag diyà sa atung kenà da eg-ulow. ²Tinubad sa tegesugkow kagi i Nemula iya wé atung kenà da eg-ulow danà i Datù Nemula igsugù kenagdi. Huenan di, mig-ikagi, guwaen di, “O atung kenà da eg-ulow, dineg ko sa kagi i Datù Nemula. Dumuen sa maama anaken sa sebaen tugod i Datù Dabid owoy iya sa ngadan di si Hosiya. Imatayan di diyà keniko sa medoo tegesimbà atung eg-ipat sa medoo simbaan diyà sa getan-getan, sa medoo tegeimatay hinagtay diyà keniko, owoy ulowen di ma diyà keniko sa medoo tuelan etaw.”^j

^h **12:29** Amuk diyà ki sa tanà Islaél, denu belabagan sa menuwa Dan owoy denu kimataan sa menuwa Bétél. ⁱ **12:32** Na siini pista igsugù di, iya sa pinengadanan da Pista Lawi. Igsugù i Nemula sa kebael da iya wé pista amuk meuma sepulù owoy lima agdaw diyà sa kepitu di gebulan diyà sa palay da (Lébitiko 23:34). Dodoo binaelan i Héloboam sa hagdi uyot enù ka hinali di sa atas pista anì mebaluy amuk meuma sepulù owoy lima agdaw diyà sa kewalu di gebulan diyà kenagda. ^j **13:2** Neketuu iya wé egoh di nekeuma labi telu latuh gepalay. Basa ko 2 Medoo Datù 23:15-20.

**Ini Sa Egoh Da Nesetugdugtugdug Sa Medoo
Datù Diyà Sa Uwang Tanà Islaél**

(1 Medoo Datù 14:20; 15:25-30,34; 16:1-4,6,9-13,15b-19,21-26,28-33)

14 ²⁰Na, duwa pulù owoy duwa gepalay sa lugay i Héloboam migpedatù diyà sa uwang tanà Islaél. Agulé egoh di nematay dé, si Nadab anak di sa nekesambì kenagdi egkedatù dahiya.

15 ²⁵Na, egoh i Asa duwa dé gepalay sa lugay di migpedatù diyà sa tanà Huda, iya pelawà sa egoh i Nadab anak i Héloboam egpeedung kumedatù diyà sa tanà Islaél. Dodoo duwa gepalay daa sa lugay i Nadab migpedatù diyà sa tanà Islaél. ²⁶Medaet sa binaelan di diyà sa kehaa i Datù Nemula. Inilingan di sa adat sa emà di enù ka eg-enggaten di ma sa medoo tegeIslaél egbael salà.

²⁷Aglulé pinenemdem i Baasa anak i Ahiyas tugod i Isakal tumepel sa kedatuan i Nadab. Hê, inimatayan i Baasa Nadab i diyà sa menuwa Gibeton egoh i Nadab owoy sa medoo sundalu di migseulingutan sa menuwa Gibeton, sa menuwa netepel sa medoo tegePilistiya egoh anay. ²⁸Huenan di, si Baasa sa nekesambì si Nadab egkedatù diyà sa tanà Islaél egoh sa ketelu di gepalay sa lugay i Asa migpedatù diyà sa tanà Huda. ²⁹Aglulé egoh i Baasa datù dé, inimatayan di sa langun malayan i Héloboam. Hê, neketuu dé sa kagi i Datù Nemula igpetulon di diyà si Ahiyas tegeSilo sa tegesugkow kagi di. Linengon di eg-imatay sa langun malayan i Héloboam, endà duen sa sebaen nesamà. ³⁰Iya sa nebaelan di enù ka pinebilit i Héloboam Datù Nemula i, sa Nemula sa medoo tegeIslaél, danà di migbael salà owoy danà di ma mig-enggat sa medoo tegeIslaél egbael salà.

³⁴Na, medaet ma sa binaelan i Baasa diyà sa kehaa i Datù Nemula, enù ka inilingan di sa medaet adat i Datù Héloboam owoy eg-enggaten di ma sa medoo tegeIslaél egbael salà.

16 ¹Aglulé sinugù i Datù Nemula Hihu i anak i Hanani tegesugkow sa kagi i Nemula anì mikagi diyà si Datù Baasa. ²Guwaen di, “Egoh anay kuna sa lagdà etaw, dodoo hinemilì i Nemula kuna anì kumedatù ka diyà sa medoo etaw di tegeIslaél. Dodoo inilingan ko polo sa medaet adat i Héloboam owoy inenggat ko ma sa medoo etaw i Nemula egbael salà. Huenan di migbilit Nemula i danà sa medoo salà binaelan da. ³Iya maen di ya kedanan di kuna lapeg sa malayan ko, lagà sa binaelan di diyà si Héloboam anak i Nabat. ⁴Sumalà dé sa etaw diyà sa malayan ko mematay diyà sa menuwa da, daesan medoo tuyang. Owoy amuk mematay da diyà sa mediyù dalesan, manuk ketalunan ma sa kumaen kenagda.”

⁶Aglulé, egoh i Baasa nematay dé, iglebeng da diyà sa menuwa Télsa. Iya dema sa nekesambì kenagdi egkedatù sa anak di si Éla.

⁹Agulé iya sa migpenemdem tumepel sa kedatuan i Éla si Simbeli, sa sebaen salu di atung kaunutan sa segeumpung sa medoo sundalu di tegeedà kalitun amuk mangay da gumila. Na, sebaen agdaw nelangut Éla i diyà sa dalesan i Alesa sa tegeipat sa dalesan datù diyà menuwa Télsa. ¹⁰Hê, mig-awuh Simbeli i owoy inimatayan di Éla i. Na, egoh i Simbeli migtepel sa kedatuan i Éla, duwa pulù owoy pitu gepalay dé sa lugay i Asa migpedatù diyà sa tanà Huda.

¹¹Na, egoh i Simbeli datù dé, inimatayan di sa langun malayan i Baasa. Endà duen nesamà sa medoo maama duma telahadi di owoy sa medoo loyuk di ma, anan inimatayan di kagda langun. ¹²Hê, danà di mig-imatay sa langun malayan i Baasa, neketuu dé sa kagi i Datù Nemula denu si Baasa igpetulon di diyà si Hihu, sa tegesugkow kagi di. ¹³Na, danà sa medoo salà binaelan i Baasa owoy sa anak di si Éla egoh da migpenemula sa medoo inetaw owoy egoh da ma mig-enggat sa medoo tegeIslaél egbael salà, huenan di tigtu binulitan i Datù Nemula kagda, sa Nemula sa medoo tegeIslaél.

^{15b}Na, endà nelugay sa egoh i Simbeli datù, pitu agdaw daa. Enù ka egoh sa medoo sundalu tegeIslaél migseulingutan sa menuwa Gibeton egoh da eggila diyà sa medoo tegePilistiya, ¹⁶dinineg da sa lalag sa binaelan i Simbeli egoh di mig-imatay sa datù da owoy sa egoh di migtepel sa kedatuan di. Huenan di, egoh iya wé agdaw, neseunut sa pedu da miggelal si Ameli datù diyà tanà Islaél, enù ka kagdi sa tigtu ulu-ulu sa medoo sundalu. ¹⁷Agulé miglegkà da Ameli i diyà sa menuwa Gibeton owoy inangay da eglibet sa menuwa Télsa kenà i Simbeli eg-ugpà. ¹⁸Hê, egoh i Simbeli mighaa endà mekeatu di, mig-angay polo eg-awuh diyà sa kutà dalesan sa datù, agulé tinemteman di. Huenan di, nekeunut neulow Simbeli i diyà sa dalesan di. ¹⁹Na, nematay Simbeli i danà sa medoo salà di enù ka medaet sa binaelan di diyà sa kehaa i Datù Nemula. Inilingan di sa medaet adat i Héloboam enù ka inenggat di ma sa medoo tegeIslaél egbael salà.

²¹Na, egoh i Simbeli nematay dé, nesesigbolow sa medoo tegeIslaél. Duen duma etaw egkelukuy egpedatù si Tibni anak i Ginat, owoy duen ma etaw egkelukuy egpedatù si Ameli. ²²Dodoo egoh di nelugaylugay dé, tinabanan sa medoo etaw egpedatù si Ameli Tibni i anak i Ginat. Hê, nematay Tibni i, huenan di si Ameli sa migkedatù.

²³Na, egoh i Asa telu pulù owoy sebaen dé gepalay sa lugay di migpedatù diyà sa tanà Huda, iya pelawà sa egoh i Ameli egpeedung kumedatù diyà sa tanà Islaél. Sepulù owoy duwa gepalay sa lugay i Ameli migpedatù. Na, egoh di datù dé, enem gepalay sa lugay di mig-ugpà diyà menuwa Télsa, ²⁴agulé bineli di diyà si Sémél sa getan diyà Samaliya owoy medoo sa pilak igbeli di. Agulé binaelan di sa menuwa owoy sa kutà di dahiya, owoy pinengadanan di

Samaliya,^k enù ka si Sémél sa ngadan sa etaw kenà di migbeli iya wé getan.

²⁵Dodoo migbael salà Ameli i diyà si Datù Nemula. Tigtu medaet sa binaelan di enù ka uman pa medaet sa binaelan di diyà sa kedaet sa binaelan sa langun datù nekehuna diyà kenagdi. ²⁶Inilingan di sa langun medaet adat i Héloboam anak i Nabat, enù ka inenggat di sa medoo tegeIslaél egbael salà. Huenan di, migbulit Datù Nemula i, sa Nemula sa medoo tegesIslaél, danà da migpenemula sa medoo inetaw endà duen ulan.

²⁸Na, egoh i Ameli nematay dé, iglebeng da diyà sa menuwa Samaliya. Agulé iya sa nekesambì kenagdi egkedatù sa anak di si Akab.

²⁹Na, egoh i Asa telu pulù owoy walu dé gepalay sa lugay di migpedatù diyà sa tanà Huda, iya pelawà sa egoh i Akab anak i Ameli egpeedung kumedatù diyà sa tanà Islaél. Mig-ugpà Akab i diyà sa menuwa Samaliya, owoy duwa pulù owoy duwa gepalay sa lugay di migpedatù. ³⁰Tigtu medaet sa binaelan i Akab diyà sa kehaa i Datù Nemula. Uman pa medaet sa salà binaelan di diyà sa kedaet sa salà binaelan sa langun datù nekehuna diyà kenagdi. ³¹Diyà sa penemdem i Akab, tukééy daa sa salà binaelan i Héloboam anak i Nabat, enù ka mig-uman polo sa hagdi salà binaelan, enù ka sinawa di Hésabil i anak i Datù Étbaal tegeSidon owoy pinenemula di ma sa inetaw Baal. ³²Binaelan i Akab ma sa simbaan kenà da egsimbà diyà sa Baal dutu Samaliya dò. Owoy binaelan di ma sa atung kenà da eg-ulow sa ibegay da diyà sa Baal dalem iya wé simbaan. ³³Igbugsud di ma sa kayu inetaw Astolot sa egpenemulawen da. Na, danà di uman pa medoo sa salà binaelan di diyà sa kedoo salà binaelan sa langun datù nekehuna diyà kenagdi diyà sa tanà Islaél, huenan di tigtu binulitan i Datù Nemula Akab i, sa Nemula sa medoo tegeIslaél.

Ini Sa Egoh I Datù Asa Nematay Owoy Si Hosapat Sa Nekesambì Kenagdi Egkedatù

(1 Medoo Datù 15:24; 22:41,43,46)

[24] Na, egoh i Datù Asa nematay diyà tanà Huda, iglebeng da diyà sa atung lebengan datù diyà sa Menuwa i Dabid. Agulé si Hosapat anak i Asa sa nekesambì kenagdi egkedatù.

[41] Na, egoh i Akab epat dé gepalay sa lugay di migpedatù diyà sa tanà Islaél, iya pelawà sa egoh i Hosapat anak i Asa egpeedung kumedatù diyà sa tanà Huda. [43] Inilingan i Hosapat sa mepion adat i Asa emà di, owoy endà sinekê di duu sa mepion diyà sa kehaa i Datù Nemula.

^k 16:24 Edung egoh iya, menuwa Samaliya sa kenà di umugpà sa uman sebaen etaw migkedatù diyà sa tanà Islaél.

Dodoo endà kinedanan di duu sa medoo simbaan diyà sa getan-getan. Huenan di, tapay doo eg-ulow sa medoo etaw sa mepion ngadeg dahiya owoy tapay ma doo sa keimatay da hinagtay amuk egsimbà da dahiya. [46] Dodoo hinemagawan i Hosapat sa langun tegepediyangdang maama owoy bayi nesamà mig-ugpà diyà sa medoo simbaan, sa endà hinemagawan sa emà di duu egoh anay.

**Ini Sa Egoh Di Neketuu Sa Tinulon I Iliyas Sa
Pengagdaw Taman Telu Gepalay**

(1 Medoo Datù 17:1-7)

17 ¹Na, si Iliyas sa tegesugkow kagi i Nemula tegeTésbi diyà sa tanà Galaad. Mig-angay Iliyas i diyà si Datù Akab, owoy mig-ikagi, guwaen di, “Na, ipengibet ku danà di melalù Datù Nemula i, sa Nemula sa medoo tegelSlaél owoy sa egpangunutan ku, endà umudan di diyà siini medoo gepalay sumetugdug owoy endà ma dumuen aglù taman endà ikagiyen ku duu.”^l

²Agulé mig-ikagi Datù Nemula i diyà si Iliyas, ³guwaen di, “Legkà ka dini, owoy angay ka denu tebowon agdaw. Lidung ka dutu diyà sa dapag sa lawa't wayeg Kalit dutu dibaluy lawa't wayeg Holdan denu tebowon agdaw. ⁴Mekeinem ka diyà sa wayeg Kalit, owoy suguen ku ma sa medoo uwak anì bangaan da kuna kaenen.”

⁵Hê, pinangunutan i Iliyas sa igsugù i Datù Nemula diyà kenagdi, huenan di mig-angay eg-ugpà medapag diyà sa wayeg Kalit diyà sa tanà dutu lawa't Holdan denu tebowon agdaw. ⁶Uman magtu kesimag owoy uman mahapun, tumbow sa medoo uwak migbangà epan owoy sa isedà di, owoy eg-inem ma Iliyas i diyà sa wayeg Kalit. ⁷Dodoo egoh di nelugaylugay, neeti ma dé iya wé wayeg Kalit danà di endà eg-udan dahiya.

Ini Sa Binaelan I Iliyas Diyà Sa Bayi Balu Diyà Salépta

(1 Medoo Datù 17:8-24)

⁸Agulé mig-ikagi Datù Nemula i diyà si Iliyas, ⁹guwaen di, “Halì ka dema. Angay ka ugpà diyà sa menuwa Salépta diyà sa tanà Sidon. Duen sa bayi balu dutu sinugù ku anì pekaenen di kuna.”^m ¹⁰Huenan di, mig-angay Iliyas i diyà sa menuwa Salépta. Egoh di migtebow diyà sa bengawan sa kutà menuwa, hinaa di sa bayi balu egpigkayu. Mig-ikagi Iliyas i diyà kenagdi, guwaen di, “Duen pa wayeg ko i? Peinem ko pa aken.” ¹¹Agulé egoh di telibubu egkuwa wayeg, mig-ikagi dema Iliyas i, guwaen di, “Begayi ko ma aken epan, apiya tukééy daa.”

^l 17:1 Basa ko Santiago 5:17 ^m 17:9 Basa ko Lukas 4:25-26

¹²Migsagbì sa bayi, guwaen di, “Ipengibet ku danà di melalù Datù Nemula i sa Nemula egpigtuuwen ko, endà duen sa inilegà ku epan. Duen daen sa segekemkem tapung ku diyà sa taguan di owoy sa tigtu tukééy lana dalem sa butul. Iya sa pesuwan ku egpigkayu anì ilegaen ku. Maen dé mematay ké bitil sa anak ku asal mekekaen ké doo pa segulê.”

¹³Hê, mig-ikagi dema Iliyas i, guwaen di, “Yaka egkebukul la. Angay ko dé polo ilegà. Dodoo pehuna ko ilegà sa naken kaenen, apiya tukééy daa epan owoy hatedi ko diyà kenak. Agulé ilegà ko sa niyu kaenen. ¹⁴Enù ka ini sa kagi i Datù Nemula sa egpigtuuwen ké, kami i medoo tegeIslaél, guwaen di, Endà meimet sa tapung ko diyà sa taguan di owoy endà ma meimet sa lana diyà sa butul di taman endà meuma sa egoh i Datù Nemula peudan dema diyà siini uwang tanà.”

¹⁵Agulé miglikù sa balu owoy pinangunutan di sa inikagi i Iliyas. Tuu doo, medoo agdaw sa lugay da egkaen lapeg si Iliyas, ¹⁶enù ka endà egkeimet sa tapung diyà sa taguan di owoy endà ma egkeimet sa lana, enù ka iya sa igpasad i Datù Nemula tinulon i Iliyas.

¹⁷Na, egoh i Iliyas nelugay dé dahiya, miglinadu sa anak sa bayi balu. Egketemuan eglinadu, agulé nematay. ¹⁸Hê, mig-ikagi sa bayi diyà si Iliyas, guwaen di, “O etaw i Nemula, maen di ya egbulitan ko aken? Iya kéen sa pesuwan ko mig-angay dini anì ipetiig ko sa medoo salà ku owoy anì ipeimatay ko ma siini anak ku.”

¹⁹Migsagbì Iliyas i, guwaen di, “Uwit ko diyà kenak sa anak ko.” Agulé inuwit i Iliyas diyà sa bilik diatas atung kenà di egtudug, agulé igtenà di diyà sa kamah tudugan di. ²⁰Agulé migsimbà Iliyas i egpegeni tabang, guwaen di, “O Datù Nemula, sa Nemula egpigtuuwen ku, maen di ya hediya sa binaelan ko diyà sa balu? Apiya di pa mepion sa keipat di kenak, inimatayan ko doo sa anak di.” ²¹Agulé linagkeban i Iliyas sa batà taman telu gulê owoy takà egsimbà, guwaen di, “O Datù Nemula sa egpigtuuwen ku, tigtu a egpegeni diyà keniko pelikui ko sa ginawa di.”

²²Hê, sinagbian i Datù Nemula iya wé kesimbà i Iliyas. Huenan di, nekepelikù sa ginawa sa batà owoy nehagtay dema. ²³Agulé inuwit i Iliyas dema sa batà egpenaug eg-angay diyà sa inay di, owoy mig-ikagi Iliyas i diyà sa bayi balu, guwaen di, “Taa ko, nehagtay dé sa anak ko.”

²⁴Migsagbì sa bayi, guwaen di, “Na, netiigan ku dé tuu kuna sa etaw i Nemula. Tuu sa eg-ikagiyaen ko igpesugkow i Datù Nemula diyà keniko.”

Ini Sa Egoh I Iliyas Mig-ikagi Diyà Si Abdiyas

18 ¹Na, egoh di meuma sa ketelu di gepalay sa lugay pengagdaw, mig-ikagi Datù Nemula i diyà si Iliyas. Guwaen di, “Angay ka diyà si Datù Akab, enù ka buyu dé peudanen ku.” ²Hê, mig-ipanaw dé Iliyas i enù ka mangay diyà si Akab.

Na, egoh iya, tigtu dakel sa bitil diyà sa tanà Samaliya. ³Huenan di, igasà i Datù Akab Abdiyas i sa atung umipat sa dalesan di. Na, tigtu

egpigtuu Abdiyas i diyà si Datù Nemula. ⁴Ini sa tandà di, egoh i Hésabil sawa i Datù Akab egpeimatay sa medoo tegesugkow kagi i Nemula, inalukan i Abdiyas sa melatuh geetaw tegesugkow kagi i Nemula owoy pinelidung di kagda tiglimaway pulù diyà sa duwa dake takub. Owoy binegayan di ma kagda kaenen owoy wayeg. ⁵Na, mig-ikagi Akab i diyà si Abdiyas, guwaen di, “Mipanaw ki mangay tumelow sa langun tebulan wayeg owoy sa medoo lawa't wayeg diyà siini uwang tanà Samaliya. Petow ki daa mekehaa ki sa medoo keluwen anì mehagtay sa medoo kudà ta owoy sa medoo asnu ta selubangig kudà anì endà imatayan ta duu.”

⁶Agulé nesesuway da owoy sineluh da egtimbul sa uwang tanà Samaliya.

⁷Na, egoh i Abdiyas telibubu eg-ipanaw, petow dé nesiegungan di Iliyas i owoy nekilala di. Hê, miglagkeb diyà tanà, owoy mig-ikagi, guwaen di, “Aba, si Datù Iliyas polo ini i.”

⁸Mig-ikagi Iliyas i, guwaen di, “Hoò, aken. Na, angay ko tuloni sa datù ko sa egoh ku dahini a.”

⁹Dodoo mig-ikagi Abdiyas i, guwaen di, “O Datù, ngadan sa salà binaelan ku sa pesuwan ko egpeimatay kenak diyà si Datù Akab?”

¹⁰Ipengibet ku danà di melalù Datù Nemula i, sa Nemula egpigtuuwen ko, endà duen sa sebaen tanà diyà siini sinukub langit kenà i Akab endà egpelagbet keniko. Uman tumulon sa medoo datù inigsaan di endà diyà ka sa hagdi uwang tanà, endà egpigtuuwen i Akab duu, huenan di pinepengibet di kagda amuk tuu endà hinaa da duu kuna. ¹¹Enù di ya, suguen ko aken ini egoh di anì tulonen ku diyà kenagdi sa egoh ko dahini ka? ¹²Amuk mesalidan ku kuna, petow ki daa uwiten ka sa Suguy i Datù Nemula diyà sa kenà endà nepatik ku duu, agulé amuk tulonon ku Akab i sa egoh ko dahini owoy amuk endà mehaa di duu kuna, imatayan di doo aken. Na, pehiduhidu a diyà keniko, enù ka aken ma sa tigtu egpigtuu diyà si Datù Nemula edung egoh ku batà pelawà taman ini egoh di. ¹³Endà netiigan ko duu kéen duen sa melatuh tegesugkow kagi i Datù Nemula inalukan ku egoh i Hésabil egkelukuy mimatay kenagda. Pinelidung ku kagda tiglimaway pulù diyà sa duwa dake takub, owoy egbegayan ku ma kagda kaenen owoy wayeg. ¹⁴Enù di ya, suguen ko aken petulon diyà si Akab sa egoh ko dahini ka? Imatayan di doo aken.”

¹⁵Agulé migsagbi Iliyas i, guwaen di, “Endà mebaelan ko iya wé. Ipengibet ku danà di melalù Datù Nemula i sa Nemula épê dake egkegaga egpangunutan ku, pehaa a doo diyà si Datù Akab ini egoh di.”

Ini Sa Egoh I Iliyas Migsigbolow Sa Medoo Tegesugkow Kagi I Baal

¹⁶Na, mig-angay Abdiyas i diyà si Datù Akab owoy tinulon di sa egoh i Iliyas dahiya dé. Hê, medelamet Akab i eg-angay egtelabuk si Iliyas sa tegesugkow kagi i Nemula. ¹⁷Agulé egoh da nesehaa, mig-ikagi Akab i, guwaen di, “Kuna doo mabes sa tegebogo diyà siini tanà Islaél.”

¹⁸Migsagbì Iliyas i, guwaen di, “Beken aken sa takà egbogo diyà sa tanà Islaél, dodoo kuna polo owoy sa malayan i emà ko, enù ka tinipay yu sa medoo uledin i Datù Nemula owoy egpenemulawen yu ma sa medoo Baal. ¹⁹Na, setipon ko diyà sa getan Kalmél sa langun tegeIslaél owoy sa epat gatus lima pulù geetaw tegesugkow kagi i Baal gaa owoy sa epat gatus ma tegesugkow kagi i Astolot gaa sa egsegastuwan sa sawa ko si Hésabil.”

²⁰Huenan di, sinetipon i Akab diyà sa getan Kalmél sa langun tegeIslaél owoy sa medoo tegesugkow kagi i Baal owoy tegesugkow sa kagi i Astolot ma. ²¹Egoh da nesetipon dé, mig-angay Iliyas i diyà sa taengan da, owoy mig-ikagi, guwaen di, “Ngadan pa lugay sa pedu yu egkeduwa? Amuk si Datù Nemula sa tigtu Nemula, kagdi daa sa pangunuti yu. Dodoo amuk si Baal polo sa tigtu Nemula, mebaluy kagdi sa mepangunutan yu.”

Dodoo endà egpekesagbì sa medoo etaw. ²²Agulé mig-ikagi dema Iliyas i, guwaen di, “Aken daen sa tegesugkow kagi i Datù Nemula nesamà. Dodoo si Baal, epat gatus lima pulù geetaw sa tegesugkow kagi di gaa. ²³Huenan di, begayi yu diyà kenami sa duwa tudu sapi. Ipehemilì ku diyà kenagda sa hagda imatayan, owoy sapuen da ma, agulé itenà da diyà sa medoo kayu inuhu da, dodoo endà pedeketan da duu apuy. Hediya ma sa kebael ku sa sebaen sapi. Itenà ku ma diyà sa medoo kayu inuhu ku, dodoo endà ma pedeketan ku duu apuy. ²⁴Amuk meubus iya wé, umow yu sa nemula yu. Hediya ma sa naken kebael, umowen ku ma Datù Nemula i. Agulé sumalà dé sa sumagbì pineukit diyà sa apuy, metiigan ta kagdi sa tigtu Nemula.”

Migsagbì sa langun etaw, guwaen da, “Hoò, baelan ta iya wé.”

²⁵Agulé mig-ikagi Iliyas i diyà sa medoo tegesugkow kagi i Baal, guwaen di, “Danà di medoo yu kiyu i, huna yu hemilì sa egkeiyapan yu diyà siini duwa tudu sapi. Agulé tapay yu dé baeli owoy tenai yu diyà sa medoo kayu inuhu yu dodoo yoko egpedeketan duu apuy. Umow yu polo diyà sa nemula yu anì petow dé dumuen apuy diyà sa inuhu yu.” ²⁶Agulé kinuwa da sa sebaen tudu sapi owoy tinapay da dé egsapù. Edung magtu kesimag taman nekebugsang, takà da egsimbà diyà sa Baal sa egpenemulawen da, guwaen da, “O Baal, dinegdineg ko kami.” Pinetaled da sa kagi da, owoy takà da ma egdelayaw egoh da migseulingutan sa atung kenà da eg-ulow sa ibegay da diyà sa Baal. Dodoo endà duen sa egsagbì kenagda, owoy endà ma duen sa eghauwen da apuy.

²⁷Agulé egoh di nekebugsang dé, egpelononon i Iliyas kagda, guwaen di, “Uman yu pa petaled sa kagi yu, enù ka kagdi gaa sa nemula. Egkelakà kéen danà sa liyu egbaelan di, ataw ka eg-ipanaw kéen, ataw ka egtudug kéen huenan di peenaw yu doo.” ²⁸Hê, inuman da dema egpetaled sa keikagi da. Owoy pinalian da sigpù owoy sundang sa lawa

da enù ka iya sa adat da. Huenan di, neseluh depanug sa lawa da. ²⁹Takà da egpetaled eg-umow taman sa egoh di egketeliwadaan egpenaug sa agdaw egoh di neuma dé sa atas kebegay sa medoo etaw diyà si Datù Nemula. Dodoo tapay doo endà duen sa egdinegen da eggsagbì diyà kenagda owoy endà ma duen sa eghauwen da apuy.

³⁰Agulé mig-ikagi Iliyas i diyà sa langun etaw dahiya, guwaen di, “Angay yu dapag diyà kenak.” Hê, nesetipon da langun diyà kenagdi. Agulé inupion di sa atung kenà da eg-ulow sa ibegay da diyà si Datù Nemula enù ka nelugay dé nelukat. ³¹Kinuwa di sa sepulù owoy duwa batu anì tandaan di sa sepulù owoy duwa geumpung tugod sa medoo anak i Hakob, sa maama pinengadanan i Datù Nemula si Islaél.ⁿ ³²Danà siedò medoo batu, binaelan di sa atung kenà da eg-ulow sa ibegay da diyà si Datù Nemula. Agulé kinakalan di ulingut anì meawuhan wayeg duwa pulù kalitelu. ³³Agulé inuhu di sa medoo kayu diyà sa atung kenà da eg-ulow sa ibegay da diyà si Nemula. Hê, inimatayan di sa sebaen tudu sapi, agulé sinapù di owoy igtenà di diyà sa medoo kayu inuhu. Agulé sinugù di sa duma etaw, guwaen di, “Angay yu penù wayeg sa epat buyung owoy hudud yu diyà siini ibegay ta diyà si Nemula, lapeg sa medoo kayu inuhu.” Hê, iya sa binaelan da. ³⁴Agulé mig-ikagi dema Iliyas i, guwaen di, “Uman yu dé.” Hê, binaelan da dema. Agulé mig-ikagi Iliyas i, guwaen di, “Segulê yu pa baeli.” Hê, telu gulê hinududan da wayeg sa ibegay da diyà si Nemula, ³⁵taman migdelug sa wayeg diyà sa kilidan di owoy nepenù wayeg sa kakal nekeulingut diyà sa atung kenà da eg-ulow sa ibegay da diyà si Nemula.

³⁶Na, egoh di neteliwadaan dé egpenaug sa agdaw egoh di neuma sa atas kebegay da diyà si Datù Nemula, mig-angay egtigdeg Iliyas i diyà sa taengan sa atung kenà da eg-ulow sa ibegay da diyà si Nemula owoy migsimbà, guwaen di, “O Datù Nemula, sa Nemula egpigtuuwen da i Ablaham si Isak owoy si Hakob, petiigi ko ini egoh di kuna sa tigtu Nemula diyà sa tanà Islaél owoy petiigi ko ma aken sa etaw ko migbael langun ini i danà sa igsugù ko kenak. ³⁷O Datù Nemula, sagbii ko ini i igsimbà ku anì metiigan siini medoo etaw kuna daa sa tigtu Nemula owoy anì metiigan da ma pepelikuen ko kagda ini egoh di anì mangunut da dema diyà keniko.”

³⁸Hê, petow dé migtenà sa apuy i Datù Nemula anì meulow iya wé igbegay da. Neulow ma sa kayu owoy netunag ma sa medoo batu owoy nekeling ma sa tanà owoy neeti ma sa wayeg diyà sa kakal nekeulingut. ³⁹Na, egoh sa medoo etaw mighaa iya wé, miglagkeb da diyà tanà owoy mig-ikagi da, guwaen da, “Si Datù Nemula sa tigtu Nemula. Si Datù Nemula daa sa tigtu Nemula.”

ⁿ 18:31 Basa ko Génesis 32:28

⁴⁰Agulé sinugù i Iliyas kagda, guwaen di, “Sigkem yu dé sa medoo tegesugkow kagi i Baal. Apiya sebaen, endà duen sa pepelaguyen ta.” Hê, sinigkem da kagda langun. Agulé inuwit i Iliyas eg-angay diyà sa wayeg Kison. Agulé igpeimatay di kagda dahiya.

Ini Sa Egoh Di Eg-udan Dema

⁴¹Na, mig-ikagi Iliyas i diyà si Datù Akab, guwaen di, “Angay yu dé kaen enù ka egdinegen ku sa pegawpaw sa udan.” ⁴²Hê, mig-angay Akab i egkaen. Dodoo si Iliyas, mig-uman egtekedeg diyà sa lantung Kalmél. Migligkued diyà tanà owoy miglusuk taman nekeuma sa kilay di diyà sa lulud di enù ka migsimbà diyà si Nemula. ⁴³Agulé mig-ikagi Iliyas i diyà sa egsugùsuguen di, guwaen di, “Tekedeg ka pa uman, angay ka sugpayal denu dagat.”

Hê, migtekedeg uman sa egsugùsuguen di owoy migsugpayal. Egoh di migpelikù, guwaen di, “Endà duen sa eghauwen ku dutu.” Na, taman pitu gulê anan hediya sa kesugù i Iliyas sa egsugùsuguen di. ⁴⁴Agulé egoh sa kepitu di gulê sa kesugpayal sa egsugùsuguen di, mig-umow, guwaen di, “Duen sa eghauwen ku tukéey gaeb éhê kelabel kagpa belad kedu diyà dagat eg-angay diyà awang.”

Agulé sinugù i Iliyas sa egsugùsuguen di, guwaen di, “Téél ka dé. Angay ko tuloni Datù Akab i anì tapayen di ipekagat sa kalitun diyà sa kudà anì lumikù anì endà meuma di udan.”

⁴⁵Hê, endà iseg di nelugay, egdugkelum sa langit owoy migkeleges ma sa kelamag owoy egtemù ma dé eg-udan. Mig-edà kalitun Akab i anì mapes tumbow dutu Hésilil dò. ⁴⁶Dodoo tinunungan i Datù Nemula Iliyas i. Agulé igleget di sa melomboy kawal di anì kumetéél lumetu. Hê, egletu Iliyas i egkehunawan di sa kudà eggodoy sa kalitun inedaan i Akab taman sa egoh da nekeuma Hésilil dò.

Ini Sa Egoh I Iliyas Migpelaguy Eg-angay Dutu Getan Sinay Dò

19 ¹Na, egoh i Datù Akab migtebow Hésilil dò, tinulon di diyà sa sawa di si Hésabil sa langun binaelan i Iliyas owoy sa egoh di mig-imatay sa langun tegesugkow kagi i Baal. ²Agulé pineuwitan i Hésabil kagi Iliyas i, guwaen di, “Egpengibet a ini egoh di mepion amuk meimatayan a sa medoo nemula ku amuk endà petuuwen ku duu sa ungayà ku mimatay keniko sa egoh di endà pa meuma sa éhê ini mendaa ulas simag. Baelan ku ma doo diyà keniko sa éhê binaelan ko diyà sa medoo tegesugkow kagi i Baal.”

³Na, egoh i Iliyas neketiig iya wé, tigtu nelimedangan. Huenan di, migpelaguy lapeg sa egsugùsuguen di eg-angay dutu menuwa Bilsiba dò diyà sa uwang tanà Huda. Agulé sinalidan di sa egsugùsuguen di dahiya. ⁴Dodoo miglagbas polo Iliyas i diyà sa melabel tanà mediyù dalesan.

Egoh di segeagdaw dé sa lugay di eg-ipanaw, migpenuu Iliyas i diyà sa pesu kayu owoy migsimbà, guwaen di, “O Datù Nemula, kuwa ko dé aken ini egoh di, enù ka tigtu dakel sa lihay ku. Mepion pa hedem amuk mematay a, enù ka endà dé egkeulaanan ku duu sa hagtay ku.”

⁵Agulé mighibat Iliyas i diyà sa pesu kayu, owoy neketudug ma. Hê, petow dé migtebow sa egsugùsuguen i Nemula. Kinugow di Iliyas i owoy mig-ikagi, guwaen di, “Enaw ka dé owoy kaen ka ma.” ⁶Hê, egoh i Iliyas miglangalanga, hinaa di diyà sa inulunan di sa segetibulu epan neilegà danà sa keedup sa batu owoy duen ma wayeg diyà sa tukééy buyung. Hê, migkaen owoy mig-inem ma. Agulé mighibat dema. ⁷Agulé migpelikù sa egsugùsuguen i Datù Nemula owoy inenaw di dema Iliyas i. Guwaen di, “Enaw ka owoy kaen ka dema, enù ka endà mekegaga ka kéen mipanaw.”

⁸Agulé mig-enaw Iliyas i owoy migkaen dema owoy mig-inem ma. Migkebagel dé sa lawa di danà di migkaen, huenan di endà egpeketues di eg-ipanaw taman epat pulù agdaw lapeg sigep taman sa egoh di nekeuma diyà sa getan Sinay pinengadanan Getan Tanà i Nemula.

⁹Na, egoh di migtebow, mig-awuh diyà sa takub enù ka tumudug dahiya. Hê, mig-igsà Datù Nemula i diyà kenagdi, guwaen di, “O Iliyas, ngadan sa egbaelan ko dini?”

¹⁰Migsagbì Iliyas i, guwaen di, “O Datù Nemula épê dakel egkegaga, kuna daa sa eg-unut-unutan ku. Dodoo sa medoo tegeIslaél, inekedan da polo sa pasad ko diyà kenagda egoh anay owoy linukat da ma sa atung kenà etaw eg-ulow sa ibegay da diyà keniko owoy inimatayan da ma sa langun tegesugkow kagi ko. Aken daen sa nesamà, owoy egkelukuyan da ma aken eg-imatay.”

¹¹Agulé mig-ikagi Datù Nemula i diyà si Iliyas, guwaen di, “Laun ka dé. Angay ka tigdeg diyà sa taengan ku diyà siini pulu tuduk.” Agulé migtalà Datù Nemula i. Duen sa tigtu meleges kelamag. Hê, mig-elà sa getan owoy egketubék ma sa medoo batu, dodoo endà diyà di iya wé kelamag Datù Nemula i. Agulé egoh sa kelamag miglinek dé, duen sa linug. Dodoo endà ma diyà di iya wé linug Datù Nemula i. ¹²Agulé egoh di migsabuh dé sa linug, duen sa apuy. Dodoo endà ma diyà di iya wé apuy Datù Nemula i. Agulé egoh di nepadeng dé sa apuy, duen sa egdinegen i Iliyas egbadàbadà endà metaled di.

¹³Na, egoh i Iliyas migdineg iya wé, dinilungan di kegal sa palas di. Agulé mig-angay egtigdeg diyà sa ebà takub. Hê, dinineg di sa eg-ikagi, guwaen di, “O Iliyas, ngadan sa egbaelan ko dini?”

¹⁴Migsagbì, guwaen di, “O Datù Nemula épê dakel egkegaga, kuna daa sa eg-unut-unutan ku. Dodoo sa medoo tegeIslaél, inekedan da polo sa pasad ko diyà kenagda egoh anay owoy linukat da ma sa atung kenà etaw eg-ulow sa ibegay da diyà keniko owoy inimatayan da ma sa langun tegesugkow kagi ko. Aken daen sa nesamà, owoy egkelukuyan da ma aken eg-imatay.”

¹⁵Agulé mig-ikagi Datù Nemula i diyà si Iliyas, guwaen di, “Pelikù ka dema angay diyà sa melabel tanà mediyù dalesan medapag diyà sa menuwa Damasko. Amuk tumbow ka diyà sa menuwa, hududi ko lana sa ulu i Hasawél anì metandaan kagdi sa meketuhì kumeditù diyà sa uwang tanà Siliya. ¹⁶Hududi ko ma lana sa ulu i Hihu anak i Nimsi anì metandaan kagdi sa mekesambì kumeditù diyà sa tanà Islaél. Owoy hududi ko ma lana sa ulu i Ilisiya sa anak i Sapat kedu Abél-Méholà dò anì metandaan kagdi sa mekesambì diyà keniko sa tegesugkow kagi ku. ¹⁷Enù ka amuk duen etaw tigbasen i Hasawél hedem dodoo mekepelaguy, meimatayan i Hihu doo. Hediya ma, amuk duen etaw tigbasen i Hihu hedem dodoo mekepelaguy, meimatayan i Ilisiya ma doo. ¹⁸Dodoo duen doo sa pitu ngibu tegeIslaél samaen ku sa tigtu eg-unut-unut diyà kenak, enù ka endà migligkued da diyà sa taengan sa inetaw Baal^o owoy endà ma egpengadekan da duu.”^p

Ini Sa EgoH I Ilisiya Netandaan Tegesugkow Kagi I Nemula

¹⁹Huenan di, mig-ipanaw Iliyas i kedu dahiya owoy nehauwan di Ilisiya i anak i Sapat egdadu. Duen sepulù owoy duwa geetaw egdadu, owoy uman sebaen dadu, duwa sa sapi eg-uwit, owoy si Ilisiya sa nekehudihudi. Hê, egoH i Iliyas mig-ipus diyà si Ilisiya, igpipay di diyà sa pelula i Ilisiya sa sebaen kegal di, enù ka egtandaan di kagdi sa mekesambì kenagdi tegesugkow kagi i Nemula. ²⁰Agulé sinalidan i Ilisiya sa sapi igdadu di owoy linohot di Iliyas i. Mig-ikagi Ilisiya i, guwaen di, “Mangay a pelawà umebal diyà sa emà ku owoy sa inay ku, agulé munut a diyà keniko.”

Migsagbì Iliyas i, guwaen di, “Na, angay ka dé ebal dutu, enù ka endà ma eghawidan ku duu kuna.”

²¹Na, egoH i Ilisiya migpelikù, inimatayan di sa duwa sapi igdadu di owoy inilegà di. Iya sa igsenuk di sa kukung. Agulé tinukid di egbegayan sa medoo duma di anì mekekaen da. Agulé mig-angay eg-unut diyà si Iliyas enù ka kagdi dé sa tegetabang di.

Ini Sa EgoH I Akab Migtepel Sa Tanà I Nabot

21 ¹Na si Nabot tegeHéslil, duen sa hinemulaan di palas diyà Héslil medapag diyà sa metolol dalesan i Datù Akab sa datù diyà Samaliya. ²Na, sebaen agdaw mig-ikagi Datù Akab i diyà si Nabot, guwaen di, “Begayi ko diyà kenak sa hinemulaan ko palas, enù ka medapag diyà sa duwangen dalesan ku owoy ungayà ku pehemulaan ku sa medoo balangan egpengalapen. Sambian ku diyà keniko sa sebaen ma hinemulaan palas sa uman pa mepion diyà siini hinemulaan ko. Ataw ka amuk meiyap ka, bayadan ku pilak sa neseunutan ta lagà di.”

^o 19:18 Basa ko Loma 11:4 ^p 19:18 Amuk egpengadekan sa etaw sa Baal, iya sa ukit da egpenemula sa Baal.

³Migsagbì Nabot i, guwaen di, “Pehiduhidu a diyà keniko. Endà mebaluy di enù ka meketipay a diyà sa igsugù i Datù Nemula amuk dagangen ku siini tanà, enù ka neketugod ma daa diyà kenak sa tanà sa medoo tupù ku.”

⁴Agulé migkedaet sa pedu i Akab eglikù owoy tigtu ma egbulit danà sa sagbì i Nabot tegeHéslil. Mig-angay eghibat dalem sa bilik di, owoy mig-isalu diyà sa kelatkat owoy eg-eked ma egkaen. ⁵Agulé mig-angay sa sawa di si Hésabil diyà kenagdi owoy mig-igsà, guwaen di, “Ngadan sa pesuwan ko egbulit owoy endà ma egkaen ka?”

⁶Migsagbì Akab i, guwaen di, “Danà sa inikagi i Nabot tegeHéslil egoh ku mig-angay egpegeni egbeli hedem sa tanà di, ataw ka sambian ku diyà kenagdi sa liyu hinemulaan palas. Dodoo endà ibegay di duu gaa diyà kenak sa tanà di.”

⁷Hê, mig-ikagi Hésabil i diyà kenagdi, guwaen di, “Tukééy daa iya wé. Enù di ya, beken kuna sa datù diyà siini tanà Islaél? Na, enaw ka owoy kaen ka ma. Kuwaen ku doo diyà keniko iya wé hinemulaan i Nabot tegeHéslil.”

⁸Agulé migsulat Hésabil i. Egoh di neubus dé egsulat, inilingan di sa kepilma i Datù Akab anì metandaan kedu kenagdi sa sulat. ⁹Agulé igpeuwit di iya wé sulat diyà sa medoo ulu-ulu owoy sa medoo mapulù etaw diyà sa menuwa Héslil kenà i Nabot eg-ugpà. ⁹Iya sa kagi diyà sa igsulat i Hésabil, guwaen di, “Baeli yu atas sa egoh yu peulan sa kekaen yu. Agulé setiponoy yu langun, owoy peugsad yu Nabot i diyà sa taengan yu. ¹⁰Sugù yu sa duwa etaw tegebael medaet anì tipuwen da Nabot i. Iya sa ikagiyen da sinumbung di Nemula i owoy sa datù ta. Agulé uwit yu Nabot i diyà sa liyu sa menuwa owoy buung yu batu anì mematay.”

¹¹Agulé binaelan sa medoo ulu-ulu owoy sa medoo mapulù etaw tegeHéslil sa igsugù i Hésabil igsulat di diyà kenagda. ¹²Binaelan da sa atas egoh sa langun etaw egpeulan sa kekaen da, agulé migsetiponoy da owoy pineugsad da ma Nabot i diyà sa taengan da. ¹³Hê, tinipu sa duwa etaw tegebael medaet Nabot i diyà sa taengan sa medoo etaw, guwaen da, “Sinumbung i Nabot Nemula i owoy sa datù ta.” Huenan di, inuwit da Nabot i diyà sa liyu sa menuwa owoy binuung da batu taman sa egoh di nematay. ¹⁴Agulé igpetulon da diyà si Hésabil sa egoh i Nabot nematay dé danà di binuung batu.

¹⁵Na, egoh i Hésabil neketiig iya wé, mig-ikagi diyà si Datù Akab, guwaen di, “Na, angay ko dé kuwa sa tanà endà nebeli ko duu diyà si Nabot tegeHéslil. Endà dé mekelaguk di duu diyà keniko enù ka nematay dé.” ¹⁶Hê, egoh i Akab neketiig nematay dé Nabot i, mig-angay diyà siedò tanà enù ka kuwaen di dé.

¶ 21:8 Inilingan di sa éhê baned tising i Akab diyà sa lansuk igpedeket di diyà sa sulat.

¹⁷Agulé mig-ikagi Datù Nemula i diyà si Iliyas tegeTésbi sa tegesugkow kagi di. ¹⁸Guwaen di, “Ipanaw ka angay diyà si Akab sa datù diyà sa tanà Islaél.” Hauwen ko kagdi diyà sa hinemulaan palas i Nabot tegeHéslil, enù ka inangay di dé egkuwa. ¹⁹Ikagi ko diyà si Akab, guwaen ko, ‘Ini sa kagi i Datù Nemula diyà keniko. Egoh ko neubus dé mig-imatay sa etaw, hê tinepel ko ma atu sa tanà di? Owoy ini ma sa kagi i Datù Nemula diyà keniko. Sa kenà medoo tuyang migdilà sa depanug i Nabot, dahiya ma sa niko depanug dilaen tuyang.’”

²⁰Na, egoh i Akab mighaa si Iliyas, mig-ikagi Akab i, guwaen di, “Nesehaa ki depa, o kuntelà ku.”

Migsagbi Iliyas i, guwaen di, “Nesehaa ki dema, enù ka egtemù ka dé egbael medaet diyà sa kehaa i Datù Nemula. ²¹Huenan di, ini sa kagi i Datù Nemula diyà keniko, tigtu dakel sa kepigtamay di mekeuma diyà keniko. Imatayan di kuna taman sa langun tugod ko maama diyà sa tanà Islaél, iling ka lukes ataw ka batà. ²²Pigtamayan di sa medoo tugod ko lagà sa kinepigtamay di sa medoo tugod i Datù Héloboam sa anak i Nabat egoh anay owoy lagà ma sa kinepigtamay di sa medoo tugod i Datù Baasa sa anak i Ahiyas egoh anay, enù ka tigtu pinebulit ko Datù Nemula i danà ko mig-enggat sa medoo tegeIslaél egbael salà. ²³Owoy ini ma sa kagi i Datù Nemula denu si Hésabil sawa ko, daesan sa medoo tuyang sa lawa di diyà siini menuwa Héslil.” ²⁴Sumalà dé sa etaw diyà sa malayan ko mematay diyà sa menuwa da, daesan medoo tuyang. Owoy amuk mematay da diyà sa mediyù dalesan, manuk ketalunan ma sa kumaen kenagda.”

²⁵Na, edung egoh anay endà pa duen etaw migbael medaet lagà sa kedaet sa binaelan i Akab diyà sa kehaa i Datù Nemula danà di mig-unut diyà sa ungayà sa sawa di si Hésabil. ²⁶Tigtu medaet sa salà binaelan di egoh di migpenemula sa medoo inetaw, enù ka inilingan di sa medoo tegeAmoliya sa hinemagawan i Datù Nemula egoh anay egoh sa medoo tegeIslaél anay migtebow dahiya.

²⁷Na, egoh i Akab migdineg sa inikagi i Iliyas tegesugkow kagi i Nemula, linisì di sa ginis di enù ka nesenulê, owoy migkawal polo sa binekas sakù owoy pineulan di ma sa kekaen di. Tapay doo migkawal sakù apiya di pa eghibat owoy migpetukééy ma danà di tigtu nebuluk.

²⁸Huenan di, mig-ikagi Datù Nemula i diyà si Iliyas tegeTésbi, ²⁹guwaen di, “Hinaa ko pa sa egoh i Akab tigtu migpetukééy diyà sa kehaa ku? Na, danà iya wé kepetukééy di, endà pelawà ipetuu ku duu sa kepigtamay ku kenagdi egoh di nehagtay pelawà. Dodoo pigtamayan ku doo sa medoo tugod di amuk sa anak di pa sa mekesambi kenagdi kumedità.”

† 21:18 Samaliya ma sa kepengadan da sa tanà Islaél danà i Sémél migdagang diyà si Ameli. Basa ko 1 Medoo Datù 16:24. § 21:23 Basa ko 2 Medoo Datù 9:30-37

Ini Sa Egoh I Datù Akab Nematay

(1 Medoo Datù 22:1-4,29,34-38)

22 ¹Na, telu dé gepalay sa lugay di endà nesegila sa medoo tegeIslaél owoy sa medoo tegeSiliya. ²Dodoo egoh sa ketelu di gepalay, miglengen Datù Hosapat i tegeHuda diyà si Datù Akab diyà sa tanà Islaél. ³Na, tapay dé mig-ikagi Datù Akab i diyà sa medoo salu di, guwaen di, “Netiigan yu doo nita iya wé menuwa Lamot-Galaad sa tinepel sa datù tegeSiliya. Maen di ya endà duen sa egbaelan ta anì mekuwa ta dema diyà kenagdi?” ⁴Agulé mig-igsà Datù Akab i diyà si Datù Hosapat, guwaen di, “Enù di ya, mebaluy pa diyà keniko amuk seselenganay ki mangay gumila diyà sa menuwa Lamot-Galaad?”

Migsagbi Hosapat i, guwaen di, “Na, mebaluy doo enù ka neketapay a dé lapeg sa medoo sundalu ku owoy sa medoo kudà ku ma.”

²⁹Agulé mig-angay da Datù Akab i tegeIslaél owoy si Datù Hosapat tegeHuda egpengayaw diyà sa menuwa Lamot-Galaad.

³⁴Dodoo apiya di pa pineampay sa sebaen sundalu tegeSiliya daa sa kepanà di, nesugat doo Datù Akab i. Mineketuen sa sinelang diyà sa segametan anit di. Agulé mig-ikagi Akab i diyà sa tegeuwit sa kalitun di atung eggamiten di amuk eggila, guwaen di, “Iyoh, nesugat a dé polo. Tuing ko siini kalitun ta. Pelaguyan ta sa medoo kuntelà ta.”

³⁵Na, ligò da egkesetemù egkesegila, egtuelen da daen Datù Akab i diyà sa kalitun di eg-isalu diyà sa medoo tegeSiliya. Neseluh depanug sa saeg sa kalitun di, enù ka meleges sa depanug eglesut diyà sa palì di. Hê, nematay egoh di sumigep dé. ³⁶Na, egoh di buyu dé eg-eled sa agdaw, dinineg sa langun sundalu tegeIslaél sa metaled kagi nesesedowsedow, guwaen di, “Anì lumikù dé sa uman sebaen etaw diyà sa hagdi menuwa owoy diyà sa hagdi tanà.”

³⁷Na, egoh di nematay dé Akab i sa datù diyà sa tanà Islaél, inuwit da diyà sa menuwa Samaliya enù ka ilebeng da dahiya. ³⁸Agulé egpeguséén da sa kalitun atung eggamiten di amuk eggila diyà sa linaw diyà sa menuwa Samaliya, sa linaw atung kenà sa medoo tegepediyangdang egpedigus. Agulé dinilà sa medoo tuyang sa depanug i Akab, enù ka neketuu dé sa inikagi i Datù Nemula.^t

Ini Denu Si Datù Ahasiyas Diyà Sa Tanà Islaél

(1 Medoo Datù 22:40,52,53)

⁴⁰Na, egoh i Datù Akab nematay dé, iya sa nekesambì kenagdi egkedatù sa anak di si Ahasiyas. ⁵²Dodoo medaet sa binaelan i Ahasiyas

^t 22:38 Basa ko 1 Medoo Datù 21:19

diyà sa kehaa i Datù Nemula, enù ka inilingan di sa medaet adat sa emà di owoy sa inay di. Owoy inilingan di ma sa medaet adat i Datù Héloboam sa anak i Nabat egoh anay egoh di mig-enggat sa medoo tegeIslaél egbael salà. ⁵³Egpenemulawen i Datù Ahasiyas sa inetaw Baal owoy egimbà ma dahiya. Huenan di, tigtu pinebulit di Datù Nemula i, sa Nemula sa medoo tegeIslaél, lagà mendaa sa binaelan sa emà di si Akab egoh anay.